



Te Toa Takitini

Registered at the G.P.O. as a Newspaper.

NAMA 56.

HASTINGS.

Aperira 1, 1926.

HE REO KAUMATUA E MIHI ANA KI HIKURANGI MAUNGA.

(*Na Ihiaia Hutana.*)

HEI konei ra i Hikurangi maunga. te whakamaunga atu o te ihu waka, te puputanga o te tangata i te tai a Ruatapu, ka tupu ai ano he tipu na te Atua.

He moemoea na te hinengaro matotoru, nga whakarereanga iho o nga tikanga ataahua, me nga mahi pai ana tahitotia ki roto i te pirau. Tahuri ake nei ko o koutou koroua, kuia, e tapapa wairua mai ana i te paepae o te tatau o te whatitoka o Meri Whare-karakia. Na ratou nei te mahi nui, te tope i nga ururua, te tahoro i nga maunga, te whakatika i nga wahi kopikopiko, te tahi i te marae, te whariki i te whare mo te manuhiri.

Haunga ia nga tamariki wawahi tahā o te ao hou. Kopiko atu, kopiko mai. Kei nga koroua, kuia, i roto i nga whare umu e kopae ana.

Hei konei ra Te Koroneho, korua ko Te Kairakau. nga kopura o te pito ora o te purapura i onokia e o koutou matua.

Tenei ra kua kai, kua makona, i te mana o te kai. Te aroha ki nga matua, te aroha ki ā tatou tamariki i hinga atu, ki roto i te mura o te ahi.

“Hei karauna mo nga koroua nga tamariki a nga tamariki, te kororia o nga tamariki ko o ratou matua.”—Whakatauki (17:6).



He mea Panui e Rev. F. A. Bennett, he mea ta e Cliff Press,
Queen Street, Hastings, H.B.